

Regional News Unit AIR Aizawl
Wednesday, October 08, 2025

Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

- Excise & Narcotics Department chhinchhiah danin kumin October ni 6 thleng khan Mizoramah ruihhlo vangin mi 65 an thi tawh.
- Mizoram Youth Commission kaltlanga Mizo thalaite Taiwan-a hnathawk tura an kal theih dan tur dap a ni.
- Union Cabinet Committee on Economic Affairs (CCEA) chuan cheng vaibelchhe sing 2 sang 4 leh 634 senna tur multi-tracking railway project a pawm
- US scientist pathum John Clarke, Michel Devoret leh John Martinis te chu kum 2025 Nobel Prize in Physics dawng tura thlan an ni.



EXCISE DEATH

Excise & Narcotics Department chhinchhiah danin kumin 2025-ah hian October ni 6 thleng khan Mizoramah ruihhlo vangin mi 65 an thi tawh a, ruihhlo vanga thi zingah hian heroin (No.4) vanga thi 24 awmin an tam ber.

Excise & Narcotics Department-in report an dawn chinah kumin January 1 atanga nimin October 6 thleng khan ruihhlo vangin mi 65 an thi a, heng zinga 54 hi mipa niin, hmeichhia 11 an awm bawk. Ruihhlo vanga thi mi 65 zinga 24 hi heroin (No.4) ti thin an ni a, abak mi 41-te hi ruihhlo chi khat aia tam tihpawlh thinte an ni. Kumina ruihhlo vanga thi mi 65-te hi kum 19 - 57 inkara upa an ni.

Kan corr report lo ngaithla ang.

Excise & Narcotics Department hian Mizorama ruihhlo vanga thi zat hi kum 1984 atang khan a chhinchhiah tan a, kumin October ni 6 thleng khan kum 42 chhungin ruihhlo vanga thi mi 1944 an awm a, mipa 1,707 leh hmeichhia 237 an ni.

Kum 42 chhunga ruihhlo vanga thi mi 1,944 te hi Proxyvon ti thin mi 1,161, heroin ti thin mi 296 leh ruihhlo chi khat aia tam tihpawlh thin mi 487 an ni a; Proxyvon tih thin vanga thite hi kum 1990 atanga kum 2016 thleng khan an awm a; kum 2016 hnuah hi chuan Proxyvon vanga thi chhinchhiah tur a awm tawh loh rualin kum 2016 atang vek hian heroin tih thin vanga thi an pung nasa hle thung a ni.

Kum 2016 hma lam kha chuan heroin tih vanga thite hi kum khatah an tam ber tumin mi 11 an ni a, kum 2016 hnulamah erawh an an tam ber kumin mi 39 an thi a ni.

<><><>

MSPMC

Mizoram State Project Monitoring Committee (MSPMC) Secy Pu Lalthanzuala Ralte hovin MSPMC member leh task force member ten Serchhip District Jail, Serchhip Damdawi In leh Kawlri-a Mizo Cultural Heritage Centre te nimin khan an tlawh a.

Mizoram State Programme Monitoring Committee chuan Mizo Cultural Heritage Centre, Kawlri, Serchhipa hmalak mek an endik a. “Construction of 100 bedded District Hospital at Serchhip” project kal lai mek leh Serchhip District Jail sak that mek te an tlawh bawk a. A hmunah kalin contractor te nen enfiahin, hmasawwna turte inhrilhhriat a ni.

Heng hmunhmate chipchiar taka an fan hnuin Serchhip DC Meeting Hall ah Post visit Discussion neih nghal a ni a. He meeting hi DC Pu Paul L Khuma’n a kaihruai a. Pu Lalthanzuala Ralte chuan report kimchang pein, hna kal lai mek an thawk sawt em tih leh an thawk tha tawk em tih te sawiho a ni a. Hmasawn ngaihna laite tarlangin, khawtlang mipuite tan theihtawp chhuah turin an inhrilh a ni.

MSPMC team zingah hian Arch. George Lalzuia, Er. R Romawia, Prof Chawngsailova, Er C Lalchhuanawma, MSPMC Task Force member Pi Vanchhungi, PS to Vice Chairman Pu Vanunmawia, PA to Vice Chairman Er Remlalmuanpuia, leh Pu Lalbiaknunga, Technician Quality Controll Division bakah mi pawimawh dangte an tel.

<><><>

MPSC

Mizoram Public Service Commission (MPSC) chuan sorkar kum kalmekah kum chanve chhung, April ni 1 atanga September ni 30 thleng khan hna lakna tur advertisement 31 tichhuakin, hna lakna result 38 an tichhuak tih an tarlang.

MPSC tarlan danin sorkar kum kal mekah hian kum chanve chhungin sorkar hnathawk mekte kaisanna (promotion), confirmation leh dahngehna (regularisation) atan Departmental Promotion Committee (DPC) chu vawi 178 an thukhawm a, post 500 atan sorkarah recommendation an thawn a ni.

Kan corr report lo ngaithla ang.

MPSC hian Thla 6 chhungin Limited Departmental Examination hmanga hna zawrhna (advertisement) tel loin advertisement 31 an tichhuak a, hna exam hrang hrang result 38 tichhuakin, hemi hun chhunga sorkar pisa kai ni awm zat (ni 125) atanga chhût chuan ni 3 dan zelah result pakhat tihchhuah ang zel a nih thu MPSC chuan a tarlang a; result tihchhuahah hian shortlisted candidate result leh written result chhiar tel a ni lo.

Tunah hian hna exam-na result peihfel diam tawh, engemaw harsatna avanga tihchhuah theih loh pahnih a awm mek bawk. Kum chanve chhung vek hian MPSC hian Union Public Service Commission aiawhin Examination hrang hrang vawi 9 a huaihawt bawk a; hemi hun chhung hian Mizoram Sawrkar sum bawmah revenue cheng nuai 80 chuang a chhunglut hman bawk.

<><><>

MYC

Mizoram Youth Commission Chairman Pu Malsawmzuala Ralte leh OSD to CM Pu Jonathan Lalremruata, te chu Mumin Chen, India-a Taiwan Ambassador Office-ah lengin, Mizo thalaite Taiwan-a hnathawk tura an kal theih dan tur an sawiho. Mizoram sawrkar leh Chief Minister-te'n Mizo thalaite eizawna ruahmansak ngaipawimawhin, CM pawhin Taiwan Ambassador kal ta a lo sawipui tawh thin a ni.

Pu Jonathan Lalremruata, kar hmasaa a lo dawr tawh bawhzuiin, nimin khan India leh Taiwan-in hnathawk tur thawnehhuah kawnga inremna, India-Taiwan Labor Mobility Agreement 2024 hnuaiah, Mizo thalai 50 kumin chhunga Taiwan-a tirh ni se an ti a. Taiwan-a thawk tur zawn, agreement ziah leh tul dang zawng zawng chu MYC-in a buaipui ang.

Sorkar thuchhuah tarlan danin, Taiwan-a hnathawk tur hian kum 18 chunglam mipa leh hmeichhia, hriselna endik paltlangte an kal thei dawn a. An thawhna tur company-in kal man leh senso tul an rawn tumsak dawn a ni. Taiwan sorkar hian an rama hnathawkte enkawl na dan mumal leh changtlung tak (Protection of Foreign Workers Right in Taiwan) an nei a, chumi hnuaiah chuan Mizo thalai kal turte pawhin him takin hna an han thawk thei dawn a. Ei leh in, sik leh sa leh a ram leilung thu-ah Mizoram nen a inan thu Ambassador Mumin hian a sawi. Ambassador Mumin leh Pu Jonathan-a te hian Chinese tawngin Mizoram chanchin Chinese chanchinbu lar tak Rhythms-ah an lo chhuah tawh a ni.

Taiwan-a hnathawh dan tur leh tul dang chu MYC in a la rawn tichhuak thuai dawn a ni.

<><><>

MAMIT RTI WEEK

Nimin khan Mamit DC Conference Hall-ah Right to Information Week 2025 hman niin District Bawrhsap Pu K Lal lawmlovan hun a hmanpui.

Bawrhsap chuan Right to Information Act,2005 chu mipuiin Sawrkar rorelnaa chanvo kan neih pawimawh tak a ni a, langtlang Sawrkar neih theih nana hmanraw pawimawh a nih thu sawiin mipuiin thuthlukna dik an siam theihnan Sawrkar khalh ngiltu a ni a, hmang tangkai theuh ni se a ti a. SPIO te pawhin RTI request an dawnin enliam mai lo a an mawhpurna hlen chhuak a information dik pe theuh tur leh mipuiin Sawrkara rinna an ngah ngam zel theih nan mawhpurna hlenchhuak turin a ngen nghal bawk a ni.

<><><>

SAI VACANCY

Sports Authority of India (SAI) chuan SAI Lakshmibai National College of Physical Education, Kariavattom, Thiruvananthapuram-a a ngheta thawk tur Assistant Professor (Physical Education) paruk a la thar dawn a; post 6 zinga 1 hi hnam hnufual (Other Backward Classes) leh chhungkaw harsa (Economically Weaker Section) te pualin hauh (reserved) a ni.

Hna hi India khua leh tuite tana dil theih niin, online hmang chuaha dil theih a ni a; dilnaah hian self-attested certificates/documents leh passport-size photo thehluk tel tur a ni.

Dil tumte tan October ni 9, 2025 chawhma dar 10 atanga November ni 8, 2025 tlai dar 5 thleng hun hawn a ni a; hrechiang duh tan leh dilna thehlut duh tan www.sportsauthorityofindia.nic.in ah ngaihven theih a ni.

Hna lakna atana thiamna ngai (qualifications) hi UGC Regulations, 2018-in a tarlan anga kalpui tur a ni a; SAI hian hna lak tur chungchang hi engvang pawha hnuhlet theihna dikna chanvo a nei a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

CCEA ON RAILWAY

Union Cabinet Committee on Economic Affairs (CCEA) chuan cheng vaibelchhe sing 2 sang 4 leh 634 senna tur multi-tracking railway project a pawm. New Delhi-a chanchinbumite kawmin Union I&B Minister chuan he thutlukna hi a puang a. Pu Vaishnaw chuan he project hian Maharastra, Madhya Pradesh, Gujarat leh Chhatisgarh huamchhunga district 18 a tuam dawn tih sawiin Indian railway hnuaiah relkawng km 894 a siam belh dawn a ni a ti.

<><><>

DISASTER

Sawrkar laipui chuan Haryana, Madhya Pradesh leh Rajasthan te tan National Disaster Response Fund hnuaiah fire service tih changtlunna tur cheng vaibelchhe 903 a pawm a. Union Home Minister Amit Shah-a kaihhruaia High-Level Committee thukhawm chuan heng hmalakna turte hi a ngaihtuah a. Assam leh Gujarat ten nikuma tuilian leh leimin nasa tak an tawrh vanga chhawmdawlna pek belh tur cheng vaibelchhe 707 chuang an pawm bawk a ni.

<><><>

NOBEL

US scientist pathum John Clarke, Michel Devoret leh John Martinis te chu kum 2025 Nobel Prize in Physics dawng tura thlan an ni. Heng scientist pathumte hian quantum mechanic zirchianna lama an hnathawh avangin Nobel Prize hi an dawng dawn a ni. An pathum hian University of California leh Yale University a thawk lai an ni.

<><><>